

SARS e dira dipeakanyo tše di kgethegilego bakeng sa go tswalelelwa ka gae

Pretoria, Labone 26 Matšhe PRETORIA, Ditirelo tša Motšhelo tša Afrika Borwa (SARS) di tloga di thekga ka botlalo Leano la Mmušo la Taolelo, go fetola leuba la COVID-19. SARS gape e tloga e šetša tšhaparego ya ekonomi le pelaelo yeo e diregago ka lebaka la seo se bego se sa letelwa.

Bjale ka leano la Taolelo, tsebišo ya Mopresidente Cyril Ramaphosa ya go itswalela ka gae matšatši a 21 ke kgato e šoro eupša e bohlokwa ya go thibela phatlalalo ya baerase, le go laola diphetelo tše mpšha.

Khomišinare Edward Kieswetter o boletše gore: “Re tloga re laetša kwelo bohloko go batho bao ba fetetšwego gape le batho bao ba amegago, go akaretša balefela motšhelo, bagwebi, bao ba amegago ebile ba amegago gampe ke leuba la COVID-19.”

“Re rata go ba tshephiša gore SARS e dula e ikemišeditše go fana ka ditirelo tše di hlokegago gore mmušo o kgone go tšwelapele go amogela letseno la motšhelo leo le lefelago dithoto tša setšhaba le ditirelo, mola e netefatša gore dipušetšo tša ditefelo tše di hlokegago di lefelwa go balefela motšhelo bao ba gogago ka kgara. Gape le mo nakong ye ye boima, bjale ka tebo ya leano, re tla tšwelapele go fana ka tiišetšo le go nolofaletša balefela motšhelo le bagwebi go ikgokaganya le SARS,” gwa realo Khomišinare. “Ke na le nnete ya gore balefela motšhelo bao ba tshephagalago ba tla rata go tseba tiišetšo ya gore, ka nako ye melao ya rena ya motšhelo le khastomo e dula e dirišwa go thibela bomenetša le tirišompe ya bosenyi ya mokgwatšhomo wa motšhelo” o tladitše ka go realo.

“SARS e dula e le komana madula a bapile bakeng sa tšwetšopele ya gabjale ya naga ya rena le bokamoso bja ekonomi le leago. Go ya ka melao yeo e laolaago go itswalelela ka gae, SARS e laodišitšwe go fana ka ditirelo tša pele, tše di lego bohlokwa go phethagatšwa” gore diphehagalo tša ditlamorago tša ekonomi ka lebaka la leuba la COVID di a laolwa ka mo go kgonegago,” Khomišinare a tšwelapele a realo.

Go lebeletšwe ditlamorago tša leuba le go ekonomi, Mopresidente gape o boletše ka ga magato a mmalwa a go thuša dikhamphani tše di obamelago motšhelo dikgakanegong le bašomi ba bona bao ba amegago, kudu Dientapraese tša dikgwebo tše Nnyane, tša Gare le tša Tlase (SMMES) tše SARS e tla swanelago ke go di laola ka nakwana e kopana.

Khomišinare wa SARS o feditše ka gore: “Le ge go le bjale, bjale ka mongmošomo wa maikarabelo gape wa go fana ka hlokomelo, SARS e rata go tiišetša maphelo le tšhireletšo ya bengmešomo le malapa a bona, mola e phethagatša magato ao a boletšwego ke Mopresidente. Ka fao, go kgona go šireletša bašomi ba rena le malapa a bona, SARS e tla fokotša kgokaganyo ya tebelelano ya sefahlego ka sefahlego gape le kgomano ka go fana ka boikgethelo bja ditirelo tše balefela motšhelo le bagwebi ba ka di dirišago go dirišana le SARS ka nako ye ya tswalelo ka gae.”

Balefela motšhelo le bagwebi ba kgopelwa go diriša ditirelo tša inthanete bjale ka eFiling, SARS MobiApp le e@syFile. Tše dingwe tša ditirelo tše di hwetšagalago go eFiling di akaretša dipotšišo tša dikoloto, ditefelo go SARS, dipotšišo mabapi le dipušetšo tša go šalela morago, maemo a obamelo ya motšhelo (dikgopelo bakeng sa TCS), tsebišo ya ngwadišo (IT150), go faela dipušetšo, le go hwetšagape go seta *username* (leinatirišo) le *password*.

Go tlaleletša, balefela motšhelo ba ka letšetša SARS Contact Centre (0800 00 7277). Bjale ka tiragalo yeo e sa tlwaelegago, balefela motšhelo bao ba itikilego go diriša ditirelo tša rena tša inthanete le Contact Centre ba ka dira peakanyo ya tirelo go lekala la SARS. Go fihlela go fiwa tsebišo ya go iša pele, SARS e tla thuša fela balefela motšhelo bao ba etelago diofisi tša rena ka peakanyo. Balefela motšhelo bao ba kgonthišetšego kopano ba tla fiwa tsebišo ya tiišetšo, yeo gammogo le boitšhupo bja mong, di tla dirišwago go ya ka dipeelo tša dikgaoletšo tša maeto go kgona go fana ka ditirelo tše bohlokwa.

Go hwetša lenaneo ka botlalo la ditirelo, [kgotla mo](#).